

san wolonwulan - nimòrò 81

nowanburu kalo - san 1978

bp:24 - bamakò (mali)
telefòn : 22104 — ccp : 0155
dòròmè 4

kibarudilalaw kuntigi: amadu ganyi kante

kibaru

a bè bò kalo o kalo, faso ka kibarudiso ka yamaruya kònò

"ceao" jamana kuntigiw ka kùnbèn 4nan

jamana 6 minun kelen bè ka nafa sòrô tònba dila ko "ceao" n'o jamana ye kodiwari, mali, moritani, nizèri, hotiwalita, ani sènègali ye, olu jamana kuntigiw y'u ka nyögèn kùnbèn 4 nan kè bamakò, okutòburu kalo tile 27 don.

nafa ani sòrô kofè, u bënnna bolomafara kan, nafolo ko sira la ani jamana wòorò kònò mögòw dorokoli nyögèn na, n'a ma kè ni danfarali ye.



uludu
muhamèdi
salèki
moritani
peresidan



felixi hufuye
buwanyi
kodiwari
peresidan



sangule
lamizana
hotiwalita
peresidan



musa tarawele
mali
peresidan



levopoli
sedari senghor
sènègali
peresidan



seynne kiné
nizéri
peresidan

a tònba in kunkankow bée tè se k'u fo k'u ban kibaru in kònò. min kakan ka to an kelen kelen bée hakili la, o ye jè, kanu, bèn, dèmè, hèrè ani lafiya de ye, minun bè ka nyinim jamana kuntigi 6 ninun fè u ka jamana bée kònò mögòw ye.

nowanburu kalo tile 19, san 1968, e kèra fanga ta don ye mali sòrôdasiw fè. oni nyinan cè, o bè bèn san tan de ma. latigè ani janfa sababu la, cè 14 minun ye fanga ta nyögèn fè, olu tò tora, nyinan, cè 7 dòròn de ye. fèn caman kèra; fèn caman fôra; fèn caman yera; fèn caman mènna, jugunan ani nyuman si raw kan, san tan in kònò.

fangata ani kunnawolo

sòrôdasiw ye fanga ta ja ma bëelajèlen kòsò. a ma kè kulu kelen, wali kulu dama dò ka hèrè kama, i n'a fò fòlè. o de sababu la, a bèn nèn bè bée ma mali kònò.

fanga o fanga, n'o ka jama bëelajèlen ka hèrè, o fanga tè tinyè. labilali, lafiya, bèn, hèrè, jèkafo, jè kakè ani jèkadi min yera sòrôdasi fanga kònò o ye sòrôdasiw kunkéròta, ka mali denw bée kunnawolo. janfantiw ka wale ju gu mase k'olu lanögè.

foroba baarakèdaw cayara, foroba sòrôdaw cayara, foreba tònba sigira n'o ye "udpm" ye. baarakèlaw, musew, demisènw o lù bée ka tònba sigira "udpm" hukumu kònò, finyè kura ye bée fili kabini sòrôdasiw bée fanga la. n'o tun tè tinyè ye sòrôdasiw tun tè san tan kè fanga la.

kònòkow

nyè 2: loteri san 7 nan "comatex"
nyè 3: basiru samake faatura
nyè 4-5: balikukan "oacv" kònò
nyè 6-7: kibaru kanubagaw kuma yòrò
nyè 8: janfantiw ka kiiri tigè.

loteri ye san 7 sòrò mali kònò

loteriko ye garisikèla ko de ye, mógo ka da a la, wali mógo ka tigè a la, a tinyè dòn cogo ye biye tali dòròn de ye, minum bée ye hèrè sòrò loteriko la, san 7 in kònò, an kelen kelen y'o ye, k'o mèm laadilikan wèrè t'o la tugun, bawo, bée bée loteri nafa sòrò cogo dòn sa, mógo si té biye tali fo mógo si ye tugun. mógo dòn sa, mógo si té biye tali fo mógo si ye tugun. mógo bée dugawu de kè nyogon ye sisani, garisikèw sankorotali la, bonniw sen fo.



san 1971, nowanburu kalo tile 19, loteriko daminèna mali kònò, kabini a bè bon sinya kelen kalo kone, fo kana se bonko fila ma sisani, kalo kelen kònò; kabini saraba bè miliyèn kelen na, fo kana o fana bila miliyèn 20 sisani. loteri kèra danna fèn ye; a kèra hèrè sòròda ye; a kèra jigi ye; a kèra maliden kelen kelen bée taalan ye, bawo bée nata bée sarabaw kan, loteri bennin bée sen fo. e de kèsèn biye tali kèra bée sèbè ye, mali kònò an'a kókan o kakan, bawo, nè mógo min ma biye ta, e tògò bée fo a kola cogo di? e b'a dòn cogo di, k'i garisikè kaiyi, wali k'a manyi? e bée fèn sòrò cogo di, ni biye ti bole? san welomfila in kèra an bée bole laadili san ye, a tò y'an yèrèw kelen kelen bée ka ke y'an bole.

kabini loteriko daminèna mali kònò, nowanburu kalo, san 1971 la fo kana se san 1977 ma: mógo hakè minw ye nafolo ani fèn caman werew sòrò a la, oly filè nin ye:

mili-yén-kelen	mili-yén-fila	mili-yén-duuru	mili-yén-tan	mili-yén-tan ani duuru	mobili 2sv	mobili R4	mobili R12	mobili bashe 404	firi-zidéri	kònzer-lateri	so baarawa mi-nènw
mógo	mógo	mógo	mógo	mógo	mógo	mógo	mógo	mógo	mógo	mógo	mógo
206	10	9	3	1	4	9	3	4	4	2	1

nin ye san 1973, san 1974, san 1975, san 1976 ani san 1977 dòròn de jate ye. san sa- ba jate minw b'a jè o ye san, 1971, san 1972 ani san 1978. o kòrò ye ko mógo hakè, nafolo hakè ani fènw hakè kaca ni sèbèn in kònòtaw ye.

mali ka bagi dila yòrò

faso jèkabaarakèda - a nyémogoso bée segu mara la marakala sira kan - bp : 52 - telefon : 320-183 mali jamana kònò

garidila - geseda - galadon - tapidila

fèn dawulama folòw, minw bée dila n'an yèrè ka kòori sènèlen ye popelini - bazin - geseda gari - kalali gari - fèrobo misènw - tapi dakabanaw "comatex" ka feereda mali kókan o bée: kòdiwari - sènègali - nizèri - otivalita "comatex" ka baarada mali kònò o bée: bamako - kayi - segu - móti ani gawo a fènw bée tali kè farajè jamana fènw de kan

o sababu ye kòori nyè de ye. o de kama, kòori sènè kakan ka kè sèbè ye mali fan bée kònò, walasa comatex boldò ka nyè ka tea a fè.



basiru taara tinyèso

na duman tè mèn daga la



basiru samake sara, a san binaani,
ka muso saba ni den duuru to a kò.
a y'i to lakòlikaramögòya la, k'i
nyèsin balikukalan ma. kabini ba-
likukalan bë kè tubabukan na, ba-
siru samake b'a la. a ye baara kè
dire, bafulabèn, kita, ani bamakò.
ale de ye balikukalan daminè kita,
ale de y'a yiriwa yen, fo ka kita
mankutu bonya dinyè kònò baliku-
kalan ko la.

o de sababu la, tiga ni suman sènè
sèriwusi ye balikukalan bolofara dò
dayèlè a ka baaradaba la bamakò,
ka basiru kè o nyémögò dankan ye.
komité militèri ni göférènaman ye
basiru walenyumandòn nyinan, ka
medayi di a ma.

hadamadenyà sira la, basiru sama-
ke tun ka nyi fo k'a dama tèmèn. a
tun nisòn ka di bëe kòrò. awa, a tun
tè se nyèngoya ni hasidiya la.
ala k'a da yòrò nyè.
ala k'a fara silamè su tòw kan.

dinyè tè so ye, jòn bëe n'i nakan.
dakan tè falen, jòn bëe n'i taakan.
kisi ni neema, o b'an kuntigi ye, saya m'o to.
saya tè mögö wèrè to, don bëe n'a dugujèkan.
òkutòburu kalo tile 21, san 1978, sibiri don,
laansara ni fitiri cè, kuluba pònze dògòtòròso,
kulokan bòra yen, ka don nyarela,
ko basiru kèra fure ye, ko basiru taara tinyèso.
subahanalilayi, o ka dògò ala bolo, an'a nyògònnna caman,
nyènamaw ma fèn kè ala ye, furew ma fèn k'a la.
don janya o janya, a sebali tè, saya tè mögòba dòn,
saya tè faantan dòn, a bë miniminina bëe kun na.
fosi tè silamèya bò, basiru tun ye silamè ye.
fosi tè limaniya-bò, basiru tun ye mögò limaniyanen ye.
fosi tè nyumanya bò, basiru samake tun ka nyi.
basiru samake tun ye laadiri ye, a tun b'a majigin bëe ye.
wasalalahu, an y'an sinsi ala tògò kan,
arahamani, dinyè neema nògòlen tigi don,
arahayiimi, lahara neema kérènkérènnen tigi don,
ala, da yòrò nyuman di basiru ma alijènè.
lakòlikaramögò basiru, i ye denmisèn caman jigi tugu.
balikukalankaramögò basiru, i ye bugufyè caman bò dibi la.
i ye jiri caman turu, k'u sòn, sènèkèla basiru.
i ni ce, i ni baraji, i kunnawololen taar'i da.
i sara denmisènya la, san binaani
nyènamaya la, i ye cèkòròba baaraw kè.
ala k'i fara silamè suw kan, ani
ka alijènè bulonba neemalen dayèlè i ye.
amiina.

mamadu yusufu sise



balikukalan bë sen kan tiga ni

kibaru nimòrò 78 kònò, an kumana adama bereté ni daramani kulubali ká taama kan, tiga ni suman sènè sèriwusida balikukalansow kònò. o nimòrò nyè sabanan na, an y'a fò ko sinyè wèrè, an na kuma juru konyèw kan, sènèkè cogo nyuman yiriwali, baganmara, kènèya, balikukalandenw ni kubedaw cè baaraw, koperatiwu, ni fèn caman wèrèw kan.

juru konyèw

kita mara la

dugu 213 de bë bafulabèn mara kònò, balikukalanso bë augu 150 bëe b'u magonyèfèn w nyini e togò la tiga ni suman sènè sèriwusida fè.

bafulabèn mara la

dugu 213 de bë bafulabèn mara kònò, balikukalanso ka ca yen. nka, balikukalanso minw bë kalan bolo filan na, olu de b'u magonyèfèn w nyini u yèrè togò la tiga ni suman sènè sèriwusida fè. o balikukalansow ye 40 ye.

kolokani mara la

dugu caman bë kolokani, minw bë balikukalan kë. yen dugu o dugu, ni balikukalanden jolen 5 nyògònna b'a kònò, olu bëe b'u ka minèn juru talenw hakè n'u wariw sèbèn kayew kònò.

juruw bë sara sannifeere tuma. nin dugu ninw na, sannitòn de bë jurusara konyèw nyènabò. an bë bi min na, hakili wasowaso bë mògòw la. sannijèkuluw ye koperatiwu bisigw de ye. nka, hali bi, hakiliw bë ka jakabò u ka baaraw jiidi cogo kan jamana kònò.



sènèkè cogo nyuman

balikukalan ye sènèkè cogo nyuman yiriwa kosèbè kolokani mara la. kalanforo bë dugu 90 nyògònna bolo yen, u bë tiga ni nyò sènè taari 100 nyògònna kan. sènè bë kë o kalanforow la, i n'a fò, cikèlakòlidew b'a fò cogo min. kalandenw bë foro bonya hakè n'a danni waati ni baara kétaw kë waatiw sèbèn u ka foro kò!òsili sèbèn kònò.

sannifeere tuma, u b'u hakili jakabò foro nafa kan. ni foro nyèna, u b'o dòn, ni foro ma nyè, u b'o fana dòn, min y'a to a nyèna, min y'a to a ma nyè.

mun ka kan ka kë, walasa dò bë fara foro nafa kan ? danfara jumèn bë nyinan foro ni salon wali salon-nasini foro cè ? nin bëe ye nyinin-kaliw ye, minw b'a to kolokani ba-

likukalandenw bë jè, ka u hakili jakabò u ka san o san baaraw kan.

yòrò tòw la, kalanforo man ca. nka, baara dama dòw fana bë sen kan, i n'a fò :

- baarakalan min kéra suransantu-muntò. o bë kibaru nimòrò 64 kònò.
- kènèya matarafa kalan, o bë kibaru nimòrò 74 ni 75 kònò.

suman sènè baarada kònò n'o ye "oacv" ye

baganmara

baaro k'arrikèra o la bafulabèn marala : bai iukalanden 9 sugandira dugu naani kònò, wuturunèrèya kalar kama. o dugu naani yèrè ye furaw san sannifeere kò fè.

kolokani mara la, mètènbugukaw ye baganfurakèso jò, ka fura bila a kònò. u ka wari bôlen bè 20 000 bô.

kubeda ani koperatiwu baaraw

min ye balikukalanden ni kubedaw cè baaraw ye, ani koperatiwu konyèw ye, baara caman kèra olu kan :

- denw bange donw sèbènni bè wolo-sèbèn dilali nògòya.
- lènpo dalajèli bè kè fan bèe.
- sannijèkuluw bè ka yiriwa. olu na

kè don dò koperatiwu sinsiberewe.

baara caman kuntigèra o yòròwla. a ka kan, an k'an janto nyogòn na. faamaw kana nyinè cikèlaw kò, awa cikèlaw fana kana nyinè u yèrè kò. mamadu yusufu sise

koperatiwu taamasen kura

a fòra kibaru nimòrò 71 kònò ko taamasen kura bè ka don koperatiwu kònò. o lahalaya la, koperatiwu kuntigiba yèrè ka kuma bòra kibaru kònò, ko balikukan bëna kè sababu ye ka koperatiwu konyèw faamuyali teliya jamana kònò. ko o de y'a to, jòyòrò nyuman bilala balikukan ye koperatiwu taamasen kura in kònò.

òkutòburu kalo in na, an ye lètèrè sòrò, ka bò keleya koperatiwu federasòn nyémögòw tòn yòrò. keleya ye buguni mara arondisiman dò ye. lètèrè in b'a jira ko wale dòw bè sen kan, minw bëna koperatiwu kuntigi ka kumaw matarafa ka taa a fè.

lètèrè kònò kuma filè :

anw ka kan ka foli ni barikada kè, k'a lase an ka nyémögòw ma, u ye hakili nyuman min sòrò ka nyèsin federasòn mögòw ma, koperatiwu ani balikukan baarada ka jèkabaarg siratigè la.

anw tun b'o kènè de kan tile tan ni duuru in kònò. anw mögò tan ye kalan minw kè balikukan ni koperatiwu konyèw la, o kè-ra anw ma yeelen ye, min barika bonyana. n'an ye kalan in nafa filè, a ka kan hali bi, an ka foli kè hakili nyuman tigìw ye.

sisan, an b'a ñaniya ka fèn bò kalan in kònò, min b'an ka baara yiriwa, ka sòrò sabati keleya federasòn kònò, k'an jòyòròw fa, k'a masòrò dannaya min dara an kan, keleyakaw kana tigè an na.

anw labènna. nka, kun tè di kuntigiw kò. u fana k'u ji ja, k'an ka baaraw nògòya an bolo.

ala ka koperatiwu ni batikukan sèriwusida taa nyè fè.

koperatiwu nyémögòw tòn keleya arondisiman kònò :

kuntigi	konba burama bagayògò
kuntigi dankan fòlò	burama sidibe
nafolo marala	mònzhòn dunbiya
nafolo marala dankan	mansa tarawele
feerelikèla	nama bagayògò
sènèkè ni suman ko nyémögò	bilan tarawele
sannifeere ani minèn ko nyémögòw	balà bagayògò
	cèmögò bagayògò
	janmansa bagayògò
muso kuntigi	filasira bagayògò

kibaru kanubagaw kuma yòrò

kuma kòròma

yòrò saba bè mògò la, kolo tè olu la. nka, ni o yòròw kolo donna, i fanga bè bonya, i tè ba bò. n'a ye barika bò mògò la, i fanga bè dògòya, i bè ba bò.

o ye mògò yòrò jumènw ye ?
moro sidibe
murugula

nsiirin

ja donna kungo kònò. sogow ye nyògòn dalajè, k'u bè taa kòlòn sen. sonsannin ko ale tè taa, nka, min ka d'a ye, a bè o kè kòlòn in na. kungo sogow ko o tè baasi ye.

u taara kòlòn in sen, fo k'a bila ji la. don o don, sani dugujè cè, sonsannin bè taa i min, k'i ko, ka tila, k'i bo kè kòlòn kònò. dugumaña jè, kungo sogow bè n'a sòrò, ji duurulen don ka nògò. ayiwa, u kamanaganna, u bëna fèerè jumèn de tigè ?

u kelen kelen bëe ye kòlòsili kè kòlòn da la, u ma mògò ye. barisa, sonsannin na tuma, o b'a sòrò, kòlòsila sunògòra.

a tora ten, fo u ye mana dò nyini, ka o da kòlòn in da la. sonsannin nana, k'i bolo da o la, o nòròla. a ko :

- ni i ma n'bolo bila sisan, ne bë n'bolo belebeleba da i kun sisan.

a ye o da a kun, o nòròla. a ko :

- ni i ma n'bolo bila sisan, ne bë n'sen belebeleba da i kun sisan.

a ye o d'a kun, o nòròla. sonsannin tora o la, fo k'a bolow n'a senw bëe minè mana fè. kungo sogow na na a sòrò yen, u y'a minè, k'a siri ni juru kisè ye, ka taa n'a ye wula kònò.

n'y'o sòrò yòrò min, n'y'o bila yen. bubakari kulubali
kangaba

ka bò soso

shè ni ntufa

ntufa tun ye shènin teri ye. nka, ntufa tun ka kolon. samiyè selen, shènin ko ntufa ma :

- an tè bugu jò ?

ntufa ko :

- ayi. ni sanji nana, ne bë don n'fa ka bulon kònò, ani n'ba ka bon kolon kònò.

shènin ko :

- o tè baaşı ye. ne bëna bugu dò jò. shènin y'a ka bugu jò. sanji binna, shènin donna a ka bugu kònò, ka ta mènè.

ntufa donna a fa ka bulon kònò. ji y'o bin. a taara don a ba ka bon kònò, ji y'o fana bin. a bolitò taara shènin da la. a ko :

- shènin, n'ka don wa ?

- don kè. e ma ban, an ka bugu dò jò de ?

ntufa donna. a ko :

- shènin, n'ka sigi i ka tasuma kòrò wa ?

- i sigi kè. malo tè fugaru la.

ntufa y'i sigi, ka laban ka sunògò. o la sa, n'balimaw, n'fa ta wo, n'ba ta wo, i yèrè ta nyògòn t'a la.

danseni keyita

taara a sèbekòrò nyè nyini, fo k'a sòrò.

jaa, den bë kònò in bolo. a ka denminèden tògò ko ntufanin. tile sabanan don, u nana jiri in tigèli daminè. u y'a tigè, k'a tigè. jiri in bëna bin tuma min na, kònò in ko :

- ntufanin, ne bëna taa ka nafoloba in bëe to. i ka so caman ta, ani ba, ani misi, ani wari, ani sanu.

ntufanin ma fosi sòrò, fo disa fin gaari kisè kelen, k'o siri a kan na. o de taamashyèn filè kungo kònò ntufaw kan na. danseni keyita

✓ an ka yèlè dòoni

nin kèra tangaracè dò ye. danni sanji binna, o y'a sòrò, soli tè ale fè. a wulila, ko a bë taa soli nyini. a taara du min kònò, a y'a sòrò, olu ye shò tobi. a ye foli kè. u y'a laminè. u ko :

- bisimila. i sen diyara. na an ka dumuni kè.

a ye shò ye yòrò min na, a y'a sigi, ka shò dun, fo a hakili bôra soli ko la, o min ye a na kun ye.

u bë o dumuni na, cè dò wèrè na-na, ko :

- aw ni ce.

u ye o laminè. u ko :

- i sen diyara. na an ka shò dun. a ko :

- ayiwa, mògò na kun ka fisà i ye. a'y'aw jò, n'ka n'na kun nyèfò aw ye fòlò. ne nana, aw ka soli singa n'ma, n'bè taa danni kè.

tangaracè yèrè ko :

- he, ne yèrè nana o de la.

u ko :

- e kòni ma na soli nyini.

u ye soli ta, k'a di cè dò in ma.

shò kèra tangaracè niyòrò ye.

mètaga sogoba
jakuruna

✓ ntufanin

dinyè nafolo bëe tun bë kònòw de bolo. kònòw kùntigiba tun sigilen bë jiriba dò wò kònò. dugumasa y'a mèn don min na, a ye numuw bila ka taa jiri ju in tigè.

u ye tile fòlò kè ka jiri in tigè, ka taa so. jiri ju tigèda nòròla sani ka dugu jè. dugumasa ye dabali kura siri. tile filanan, u y'a tigè, k'a tò to dòoni ye, ka taa so. jiri nòròla ko kura sani ka dugu jè. dugumasa

ladilikan

bilisi cèmogoba sinna ka don yè-re dengo ni wo boda cè ka tasuma yèri k'a kè a kan yèrè dungò kulo la, ka kulo a fa bolila ka n'i jò a ko e ! cèmogoba, yèrè dungò ma nyuman kè ne b'o dòn, nka woloka gèlèn, ne be deli i k'a to yen. bilisi cè mogoba ko yèrè dungò ma : e! n'e fako tun tè bi, ne tun bè kabako bée da e kan nka i fa bè se k'i kisi bi, o kò ne y'e tògò mèn kabini bi ma se wa n'i ma a dabilan nin kan, nin nögòn caman b'i nyè. bilisi cèmogoba ye woda bila a ye yèrè dungò bòrasan jila, a n'u fa taara nyögòn fè. tuma min n'u sera so, u fa y'i kanto yèrè dungò ma ko yèrè dungò, i ma nin ye sa wa ? ne tè foyi fò e ye tun, nka i yèrè b'a dòn nin nögòn caman b'i nyè ; ne tun b'a fè k'e kisi nin ma cogo min, ne nyögòn dò, i bë min soro i fa ye, o fana bè se k'a fò k'a b'i kisi nin nyögòn ma. wa e sababu bè kè i yèrè ye, mögò si tè e labandòn i tè yèrè dungò kè dabila, i ka sabali, i ka munyun fana.

nbalima yèrè dungò kèlaw, a tè sabali sabali de kanyi wa laban tè dinya na sabali kò, tonba tarawele, animatèri, kòlòn masantòla kolokani lamini bamakò mara

mali cikèlaw fasa

ayiwa ! n'in n'ko cikèlaw,
pilimukalatigi ye cikèla ye,
marifakala tabaga ye cikèla ye,
jènèkala mununbaga ye cikèla ye,
n'ka nin poyi nyèsinnen bè sènèkèlaw de ma
mali ciwaraw, n'bè ni aw de ye.
aw minw bè dabakala saman k'a ta fajiri
fò fitiri,
aw minw tè sògòma da feere ye ni tile
b'aw fòlò,
aw minw tè sègèn, aw tè nyinèn,
fantanw ni famaw danyinibagaw,
yatimèw misikinèw jigi,
jamana cèkolow, faso ntulomaw.
aw de bè sanji ni taratile donnia,
ka kóngò ni minögò munyun.
aw de bè dugukolo sòn n'aw wòsiji ye,
k'a nyènèmaya, k'a karaba fò ka jamanadew
bèe dahirimè sòrò.
aw ni nyani, aw ni sègèn, aw ni daba
aw ni ce, aw ni fasobaara.

cèkòrò sankari
lakòlikaramögò ka bò
baginda, kulukòrò mara la
(nin sèbenna mè kalo tile
9 san 1978).

farafin furakèli bè kisè kan

an ka nzana dò b'a jira ko ni mögò nyinanna i ju-jón kò, i laban ko bè juguya, walima, i tè laban ko-nyuman.

nin kuma in kònò, an t'a fè ka kuma fuu fò, walima ka kunfètò ko kè. an b'a fè dòròn de, ka hakiliw ji gin, k'u sòn jila, an ka farafin furakèli nafa camanw na.

bana caman kènèyara, bana caman silatununna an ka farafin furakèli sababu la k'a sérò mansara dònnikè-law ka dònfanew ma se anw ma yan fòlò.

misaliw

o banaw la, an da bè se ka se damadò minw ma, o ye sayi, kònòboli ani kònòdi-mi ye. olu kènèyali la an bée bëenna o kan. ni min ko k'o tè tinyè ye, walima ni min y'i makun o tinyè kan, o tigi ye wale nyuman dòn-bali de ye.

fo ka taa min kè, farafin furakèli bè nafa lase hadamadenw ma. k'a fò ko sumanni tè farafin furaw ta cogo la, i n'a fè hansa ra furaw ; k'a fò ko daji min bè tuu kilisi fòtòla la, kò yèrè ye banna yèlèma sababu dò ye, ninw si tè farafin furakèli nafa n'a sanga burun. olu yèrè de y'a barikama yérò ye.

farafin furakèli kanyi, walima a manyi, i ka da a la, walima i ka tigè a la, min ye tinyè ye o ye an ka nzana in de ye : ju-jón ani labanko.

a kèra cogo o cogo ye, an ka farafin furakèli tè kè fèn ye an yèrèw kò.

mamadu kulubali
kibarudilala-bamako

janfantiw ka kiiri tigèra

k'a ta san 1978 okutôbu ru kalo tile 18 na, k'a bi la a tile 21 na, moggòw ka kiiri tigèra bamakò, moggòw minun tun b'a fè ka janfa jugu siri walasa ka yelèma don komite la, ka peresi - dan musa tarawele n'a dan-namoggòw bin, k'u minè, k'u faga, ka fagan ta u nôona, barika, kisè ani mugu la.

o moggòw, n'u minèna fewuruye kalo tile 28 don, san 1978 kelen in kònò, n'u ye moggòw 43 ye, olu donna muruti in na kisima dukara cekoro bagayoko ani karimu danbele de ka wajibiya n'u ka nyèsirannya ani nègènni kôson.

min fôra u ka nyijuguya n'u ka janfa kan, bée y'o mèn, k'o kalan, kabini u minèna don fo kana se u ka kiiri tigè don na.

min bè fô k'a da o bée kan, o ye kuma kelen dôrôde de ye, min b'a jira ko din-yè kònò, hadamaden kelen kelen bée bée sara n'a aganiya de ye. janfantiw ka nyijuguya sara la shariya fè cogo min na, o file nin ye :

komite moggòw kôrôw :
kisima dukara, o bë faga cekoro bagayogo, o bë faga karimu danbele, san 20 kaso ani wajibiya baara sharili sanba sisoko san 5 kaso ani wajibiya baara

san 15 kaso ani wajibiya baara

yusufu bala sila
yacuba kulibali
alu tarawele

san 10 kaso ani wajibiya baara

sunkalo samakè

san 7 kaso ani wajibiya baara

mamadu jara
lamini keyita
mamadu bëliko njayi
tumani sidibe

san 5 kaso ani wajibiya baara

shèki kulibali
zan kulibali
madi kiyabu
atumani jalo
abudulayi jalo
musa danbèle
abubakari jara
basiru dunbiya
nuhun jawara
bakoroba jire

usumani dunbiya
gawusu keyita
abudulayi yusufu mayiga
bureyima mayiga
mamadu mariko
mamadou bobo so

kalo 6 kaso

amadu ture

moggòw minw bila la

isaaki balo
tènènba jalo
sinbo keyita
namori tarawele
ben hamudu hamudi
numukè sidib
gasire keyit
nafi njayi
ibarahima masire sima
usumani dow ko ganganasi
danbèle
samu wali sanbu jara
birama tarawele
cekura samake
usumani alifari mayiga

u ka kiiri kun fôlô jaa
bi de ye nin ye, politiki
sira kan, min ye nafolo ko
sira ye, min mana bô o fa-
na la, o bëna fô, bawo,
kiiritigèso y'a jira ko ka
politiki ko ani nafolo dun
ko bô nyôgôn na, walasa
shariya ka sira jèlen ta.

